

Headlines

- 1 प्रधानमंत्री नरेंद्र मोदी होंरें नमीं दिल्ली दे भारतीय कृषि अनुसंधान संस्थान च मती पैदावार आहले, जलवायु अनुकूल ते मते पौषक तत्वें आहली फसलें दी 109 किस्में गी जारी कीता। उनें करसानें ते साइंसदानें कन्नै गल्लबात बी कीती।
- 2 उपराज्यपाल मनोज सिन्हा होंरें आखेआ जम्मू-कश्मीर च विधानसभा चुनावें बारै कार्यक्रम लेई फैसला करने दा हक्क चुनावें आयोग कश ऐ।
- 3 जम्मू-कश्मीर च आतंकवादिएं ते सुरक्षाबलें बश्कार होए दे टाकुरें च सेना दे 2 जवान शहीद। एहदे पर रक्षा मंत्री राजनाथ सिंह होंरें दुख ते बसोस जाहिर कीता ऐ।
- 4 उपराज्यपाल मनोज सिन्हा होंरें श्री माता वैष्णो देवी जी दे मंदर च मत्था टेकेया। उनें भवन च यज्ञ शाला दा उद्घाटन कीता। मचेल माता दी यात्रा च अजे तगर इक्क लक्ख थवां बह श्रद्धालुएं मंदर च मत्था टेकेया ऐ।

<><><><><><>

PM

प्रधानमंत्री नरेंद्र मोदी होंरें अज्ज नमीं दिल्ली दे भारतीय कृषि अनुसंधान संस्थान च मती पैदावार देने आहिलयां जलवायु अनुकूल ते मते पोषक तत्वें कन्नै भरोची दियें फसलें दियें 109 किस्में गी जारी कीता। एह किस्मां 61 फसलें दियां न जिंदे च राई-बाई दियां 34 ते बागवानी दियां 27 फसलां शामिल ना। राईबाई कन्नै जुडी दियें फसलें च बाजरा, तिल, दालां, गन्ना, कपास ते होर दुइयें फसलें दे बीं शामिल ना। बागवानी फसलें च फल, सब्जी, मसाले, फुल ते दोआइयें आहलें पौधे दे बीएं सनें होर पोषक फसलें दी किस्में गी बी जारी कीता गेआ। इस मौके प्रधानमंत्री नरेंद्र मोदी होंरें करसानें ते साइंसदानें कन्नै गल्लकत्थ बी कीती। फसलें दी नमीं किस्में बारै बोलदे होई श्री मोदी होंरें आखेआ जे इंदे कन्नै कृषि मुल्लें च बाद्दा होग। करसानें गलाया जे नमीं किस्में कन्नै उंदे खर्चे च कमी औग ते चौपासम पर सकारात्मक असर पौग। प्रधानमंत्री होंरें मुट्टे अनाज दा बी जिक्र कीता ते आखेआ जे हुन लोक पोषक खानपान बक्खी चेचा ध्यान देआ'रदे ना। श्री मोदी होंरें नमीं किस्में दी फसलें गी विकसित करने ताई साइंसदानें दी सराहना बी कीती।

<><><><><><>

LG-Polls

जम्मू-कश्मीर दे उपराज्यपाल मनोज सिन्हा होंरें अज्ज आखेआ जे केंद्र शासित प्रदेश जम्मू-कश्मीर च विधानसभा चुनावें दा कार्यक्रम तय करने दा टकोहदा अधिकार चुनावें आयोग कोल ऐ। हालांकि उनें मेद जताई जे जम्मू-कश्मीर च तौलें गै लोकतांत्रिक प्रक्रिया अपनाई जाग। ध्यानजोग ऐ जे 2018 च पीडीपी-बीजेपी सरकार दे टौहने मगरा 6 बरे बह समें थमां इत्थें लोकें आस्सेया चुनोई दी सरकार नेई ऐ। जम्मू यूनिवर्सिटी च मालवीय मिशन शिक्षक सिखलाई केंद्र दी नमीं बनाई गेदी ईमारत दा उद्घाटन करने परैंत पत्रकारें कन्नै गल्ल करदे होठ श्री सिन्हा होंरें जून म्हीने च श्रीनगर दे अपने दौरे दौरान प्रधानमंत्री नरेंद्र मोदी हुंदी टिप्पणी दा बी जिक्र कीता जे विधानसभा चुनावें तौले गै करवाए जांगन ते 5 अगस्त 2019 गी संसद च गृहमंत्री अमित शाह हुंदे बयानै दा बी जिक्र कीता जे हदबंदी मगरा ना शडा विधानसभा चुनावें हांगन, सगुआं बेले सिरे इसी राज्य दा दर्जा दित्ता जाग। उनें आखेआ जे एह सारी प्रक्रिया उस्सै दा हिस्सा ऐ। उनें मेद दस्सी जे तौलें गै विधानसभा चुनावें करोआए जांगन। श्री सिन्हा होंरें चुनावें आयोग दी समूलची टीमें दे हाल दे दौरे मगरा दिल्ली परतौने शा पैहले सियासी दलें, आला अफसरें ते होर दुए सरबंधत लोकें कन्नै लग्गी दी बैठकें दा बी जिक्र कीता। राज्यपाल होंरें गलाया जे विधानसभा चुनावें दी तरीक के होग एह भारतीय चुनावें आयोग दा टकोहदा कम ते अधिकार ऐ।

<><><><><><>

Div. Com Tiranga Yatra

जम्मू दे डिविजनल कमिशनर रमेश कुमार होंरें स्वतंत्रता दिवस दे सरबंधै च आयोजित कीते जाने आहली तिरंगा यात्रा ते बक्ख-बक्ख गतिविधियें दी तैयारियें दी समीक्षा करने आस्तै कल जिला प्रशासन ते विभागाध्यक्षें कन्नै लग्गी दी बैठक दी

प्रधानता कीती। बैठक च जम्मू सांबा-कठुआ रेंज दे डीआईजी. डी.आई.जी ट्रेफिक जम्मू, जम्मू संभाग दे सब्बै डी.सी, विभागें दे अध्यक्ष ते होर मुतल्लका अफसरें शिरकत कीती। डिवकाम होरें जम्मू खित्ते दे जिला प्रशासनें आस्सेया तिरंगा यात्रा, तिरंगा संगीत कार्यक्रम, तिरंगा कैनवस दे सिलसिले च कीती गेदी तैयारियें दा जायजा लैता। बैठक च दस्सेया गेआ जे जम्मू जिले च तिरंगा यात्रा दा सरिस्ता 12 अगस्त गी कीता जाग। यात्रा गुलशन ग्राउंड पुलिस मुख्यालय थमां रम्भ होइये जम्मू यूनिवर्सिटी दे पिछले गेट, गुजर नगर, तवी पुल ते परतिये पुलस मुख्यालय पुज्जियै सम्पन्न होग। श्री रमेश कुमार होरें जिला प्रशासन गी जिला ते सब डिविजन सतह पर सांस्कृतिक कार्यक्रमै दा सरिस्ता ते इस्सै चाल्ली दियें गतिविधियें कन्ने तिरंगा संगीत कार्यक्रम आयोजित करोआने दे निर्देश दित्ते। इस दौरान स्वच्छता अभियान चलाने, झंडा चाढ़ने, सरकारी इमारतें गी रोशन करने ते सरकारी वेबसाइटें दी बैकग्राउंड गी तिरंगे च बदलने दे हुकम बी जारी कीते। तिरंगा श्रद्धांजलि तहत अफसरें गी आखेआ गेआ जे ओहू शहीदें दे परोआरें दा दौरा लान ते अपने-अपने जिलें च शहीदें दी मूर्तियें ते शिलापट्टें पर श्रद्धांजलि अर्पित करन। तिरंगा शपथ लैने दे अलावा तिरंगा कैनवस पर सनेआ लिखेआ जाई सकदा ऐ जिसी स्वतंत्रता दिवस समारोह दा हिस्सा बनने लेई नमीं दिल्ली भेजेया जाग।

<><><><><><>

### Independence Day Reasi

78में स्वतंत्रता दिवस दे मौके पर देश भरै थमां टकोहदे परोहने दी मौजूदगी च नमीं दिल्ली दे लाल किले च एहू ध्याड़ा जोश जज्बे कन्ने मनाया जाग। उआं ते एहू दिन समूलचे देसै च चायं-चायं मनाया जंदा ऐ, पर लाल किले च किश टकोहदे लोकें गी चेचे तौरा पर साद्दा दित्ता जंदा ऐ। जम्मू-कश्मीर दे रियासी जिले दी मोनिका शर्मा गी बी इस समारोह च शामिल होने लेई खासतौरा पर सहेया गेदा ऐ। मोनिका शर्मा होर जिले दे दूर-दरेडे इलाकें च महिलाएं दे सशक्तिकरण लेई कम करदियां न। उनें इस बारै गल्ल करदे होई आखेआ।

<><><><><><>

### Kathua-EP SKM

शहीद राइफलमैन अर्जुन सिंह होरेंगी उंदे जद्दी ग्रां देसा सिंह दे पंचैत घर च बड़ी बद्द गिनतरी च लोकें दी मौजूदगी च 'एक पेड़ शहीदों के नाम' कार्यक्रम तैहत भावें भरोची दी श्रद्धांजलि भेंट कीती गेई। इस मौके पर ग्रामीण विकास मैहकमे दे सहायक आयुक्त अखिल सडोत्रा, शहीद अर्जुन सिंह दे परोआर दे मिम्बर ते बड़ी बद्द गिनतरी च ग्रां दे लोक मौजूद हे। उनें पंचैत घर च शहीद अर्जुन सिंह हुंदी समाध पर फुल्ल चाढ़ियै श्रद्धांजलि दित्ती। इस मौके शहीद गी सलामी दित्ती गेई ते उंदे परोआर गी सम्मानित कीता गेआ। इस बारै बोलदे होई ACD अखिल सडोत्रा होरें आखेआ।

<><><><><><>

### Rajnath-Singh

केंद्र शासित प्रदेश जम्मू-कश्मीर च कल दक्खन कश्मीर दे अनंतनाग जिले च कोकरनाग दे गगरमांडू इलाके च अहलान ग्रां च आतंकवादियें ते सुरक्षा बलें बश्कार लगगे दे टाकरे च सेना दे दऊं जवान शहीद ते दऊं नागरिक जखमीं होई गए हे जिंदे च इक नै जखमें दा ता नेई जरदे होई अस्पताल च दम त्रोड़ी दित्ता। खीरी समाचार थहोने तक्कर टाकरा जारी हा ते इस सरबंधें च होर ब्यौरे गी बलगेया जा करदा ऐ। तोआई रक्षा मंत्री राजनाथ सिंह होरें टाकरे च शहीद होए दे दिलेर ते बेखौफ हवलदार दीपक कुमार यादव ते लांस नायक प्रवीण शर्मा हुंदी शहादत पर दुख ते बसोस प्रगट कीता ऐ। श्री सिंह होरें सौगी परोआर कन्ने हमदर्दी जतांदे होई आखेआ जे समूलचा देस दुखै दी इस घडी च उंदे कन्ने मजबूती नै खडोते दा ऐ।

<><><><><><>

### Kishtwar-Encounter

अज्ज बडुलै मुंह न्हरे किशतवाड जिले दे दूर-दरेडे जंगलें च सुरक्षा बलें ते आतंकवादियें बश्कार टाकरा रम्भ होआ हा। अधिकारियें दस्सेया जे आतंकवादियें दी गतिविधियें दी सूह मिलने परेंत सेना ते नीम फौजी बलें दी मदाद कन्ने पुलिस नै नौनट्टा, नागेनी पेयास ते आहले-दोआले दे इलाकें च अभियान चलाया। इस दौरान किश चिरै तोड़ी टाकरा चलेया। इलाके च बाददू बलें गी भेजेया गेआ ऐ ते आतंकवादियें दी तपाश आस्तै अभियान चलाया जा'रदा ऐ।

<><><><><><>

## LG-Vaishno-Devi

उपराज्यपाल मनोज सिन्हा होरें श्री माता वैष्णा देवी मंदर च अज्ज मत्था टेकेआ ते केंद्र शासित प्रदेश जम्मू-कश्मीर दे लेकें दी शांति, खुशहाली ते प्रगति दी कामना कीती। पवित्र श्राइन दे अपने दौरे दौरान उपराज्यपाल होरें भवन च यज्ञशाला श्रद्धालुएं गी निमित कीती। यज्ञशाला धार्मिक थाहर च महत्वपूर्ण जगह रक्खदी ऐ। इसी बडे खरे ढंग्गै सिर त्यार कीता गेआ ऐ तां जे भवन च होर मतियां धार्मिक गतिविधियां होई सकन। एहदे कन्नै श्रद्धालुएं दी धार्मिक जरूरतें गी पूरा कीता जाई सकोग। नमें तैयार यज्ञशाला पराने स्नान घर दे कोल ऐ। इत्थे 5 हवन कुंड बनाए गए न।

<><><><><><>

## Machail-Yatra

सालाना श्री मचेल माता यात्रा दौरान श्रद्धालुएं दा खासा रश दिक्खेआ जा रदा ऐ। अजें तगर इक लक्ख थ्वां बद्द श्रद्धालुएं माता दे मंदर च मत्था टेकेआ ऐ। सालाना यात्रा लेई किशतवाड प्रशासन आस्सेया कीते गेदे बंदोबस्तें पर श्रद्धालुएं संदोख जाहिर कीता ऐ। श्रद्धालुएं इनें इंतजामें लेई प्रशासन दी सराहना बी कीती। गड्डिएं लेई शिडक चशौती तगर पुज्जी ऐ जेदे कन्नै पैदल टुरने लेई पैंडा घट्ट होई गेआ ऐ। 4-जी राबता, हैलीकाप्टर सेवा, यात्रा लेई ऑनलाइन पंजीकरण ते होर दुइयां सूलतां श्रद्धालुएं लेई उपलब्ध न। इनें सुविधाएं ते सहूलतें राएं एह यात्रा हुन होर बी सुविधाजनक होई गेई ऐ।

<><><><><><>

## BSF-Amarnath

देसै दियें सरहदें दी हिफाजत करने ते दुश्मनं दियें नापाक हरकतें पर नजर रखने दे कन्नोकन्नी सीमा सुरक्षा बल दे जवान श्री बुड्डा अमरनाथ जी दी यात्रा पर औने आहले शिवभक्तें ताई अगगे आए ते उंदे लेई लंगर दा सरिस्ता कीता। लंगर दी टकोहदी गल्ल एह ऐ जे लंगर बल दे जवानें पास्सेया बनाया जंदा ऐ। लंगर च दाल-चावल, रोटी, सब्जी, देहीं ते हल्वा वगैरा दित्ता जंदा ऐ। लंगर बारे बोलदे होई इक्क यात्रु नै आखेआ।

<><><><><><>

## Samba-Martyrd

भारत माता दी आन-बान ते शान लेई अपनी जिंदू दा बलिदान देने आहले 25 पंजाब रेजिमेंट दे शहीद सिपाही नेकराम जी हुंदा 20मां शहादत दिवस अज्ज सांबा जिले च उंदे जद्दी ग्रां दबोह च पूरे मान-सम्मान कन्नै मनाया गेआ। इस मौके पर पंजाब रेजिमेंट 25 दे साबका अफसरें, शहीद दे परोआर आहलें, इलाके दे साबका पंच सरपंचें उनेंगी चेत्ता करदे होई श्रद्धांजलि दित्ती ते उंदी प्रतिमा पर हार चाढे। ध्यानजोग ऐ जे नेक राम होर 11 अगस्त 2004 च पुंछ दे मेंढर सैक्टर च आतंकवादियें कन्नै लडदे होई अपनी जिंदू दा बलिदान देई दित्ता हा। इस मौके बोलदे होई 25 पंजाब रेजीमेंट दे रिटायर्ड कर्नल मंजीत सिंह होरें आखेआ।

<><><><><><>

## Olympic

पेरिस ओलंपिक्स च भारत दा अभियान आधिकारिक तोरा पर कल मुकम्मल होई गेआ। भारत नै कुल 6 तगमें जिते। अज्ज रातीं साड्डे 12 बजे स्टेट डी फ्रांस च समापन समारोह लग्गोग जेदे च तकरीबन 80 ज्हार दर्शकें दे शामिल होने दी मेद ऐ। इस समारोह गी रिकार्ड नां दित्ता गेआ ऐ जेदे च एथलीटें दी कामयाबी ते उपलब्धियें दा जश्न मनाया जाग। समापन समारोह च मन्ने परमन्ने दे एक्टर ते कलाकार अपनी-अपनी प्रस्तुति देंगन। भारत पास्सेया दऊं बारी ओलंपिक पदक जित्ती चुके दे पी.आर श्रीजेश ते मनु भाकर गी समारोह दरान परेड ताई ध्वजवाहक दे तौरा पर चुनेया गेआ ऐ। श्रीजेश गी उंदी बेमिसाल गोल कीपिंग ताई भारत दी दीवार दे तौरा पर जानेया जंदा ऐ, उनें इस बारी कैंस दा तगमा जित्तने आहली हॉकी टीम थमां हाल च गै सन्यास लेई लैता ऐ। जिल्ले के मनु भाकर नै आजाद भारत दे इतिहास च ओलंपिक खेड्डें दे इक्के संस्करण च 2 तगमें जित्तने आहली पैहली एथलीट बनियै इतिहास रची दित्ता।

<><><><><><>